

Хӑнты ясаӑҥ



Основана
1 ноября 1957 года

11.08.2022
№15 (3603)

Шуши мир ёмаӑхӑтл пила!



Вӑйт лор тылӑш 6-мит хӑтлӑн «Торум Маа» музей хуца Мӱвтел шуши мир ёмаӑхӑтл постӑсы. В. Мехнин верум хур

Муй вӱрн нявремӑт
пӱпи хот верӑта
хуцты

» 4-5

Муй щирн Сӱмӑтвошн
нявремӑт рӱтьщӑсӑт

» 8-9

Хӑнты мир йис
вӑлупсы яма вӑлдӑ

» 10

Тынаң рәт мұв ёхлұв!



ширәт мұң Россия мұвев па иса мұвтелд мирәт пәта шеңк мосләт. Шит «Художественное открытие народов Севера» вер тәты пурайн уша йис. Ши унтасн арсыр оса верәт нётты питлдыйт, мәта утәт шуши мирәт вәлупсы па культура верәт нух алумты пәта ләщәтсыйт.

Югра мұвев әр, хән мұң йис верәт ән юремәлұв. Күтәвн йм нумәсн, йм ширн вәлты питлұв.

Тәлаң ёш, тәлаң күр нынана, кашәң хоттелд ёх уяңа-пищәңа ат вәл.

*Ёмвош округ кәща не
Наталья Комарова*

*Хәнты ясаңа тулмаштәс:
Надежда Вах*

Шуши мирәт хәтл вұраңн йм вўща ясңәт нынана китлум.

Мұң мұвевн арсыр мирәт күтәлн и нумәсн па ләхсәңа вәлләт. Мұң округев пәта шит елды йм па тумтак вәлупсы.

Хәнтәт, вухалят, юрнәт йис верәт, ясңәт, вәлупсы

Ши олаңән округ мир ймәлты верәт тәты департамент кәща хә Алексей Добровольский лупәс. Лұв ясңәл эвәлт уша йис, кәт тыләщ юпийн коронавирус мәш эвәлт немасыя нюл мухты есәлты пуртән тәды.

Ешавәл Югра мұва йилдуп пуртән тәды

» *Нюл мухты есәлты вакцина эвәлт хәннехуята арсыр мәшәт хойты ән питләт, – лупәс А.А. Добровольский.*

Вәщ тыләщн Югра мұвевн коронавирус мәшн мәшитты ёх ара йиты питәс.

Округев дуваттыйн лапәт пәльницайн нема-

сыя 73 нуры ләщәтман вәл.

А.А. Добровольский Югра мұв ёх иньщәсупсәт юхды ясңәт миюм пурайн лупәс, хуты ин пәльницая венш сух пила йңхты мосл.

Путәр хәншәс:
Людмила Шульгина

Айләт ёх пәта «Аләң» әктупсы вәс

Ёмвошн вәйт дор тыләщн 1-10-мит хәтләтн олаң хәтл эвәлт 10-мит хәтл вәнәтә «Аләң» немуп айләт ёх әктупсы вәс. Тәм воша Россия мұв 53 сұңәт эвәлт 500 хәннехә юхтыйлсәт. Ши ёх күтн 50 хәннехә щит экспертәт па 100 хәннехә щит айкел әкәтты па хәншты ёх.

Тәм вән әктупсы Археопарк хуща ләщәтса. Тәм уральской айләт ёх әктупсы пәта пұнаң сух эвәлт вән нохәр верса. Тәм тәхия верум нохәр Россия луваттәвн мет вән арт-объект, ши пәта лұв немәсыя рекордәт хәншты непека хәншса. Тәм нохәр кәршаттал – 5 метра мулдас, луваттәл – 3 метра мулдас.

Тәм «Аләң-2022» әктупсы пұншман и тәхия ипуляң 12 щурәс хәннехә әкмуәт. Юхтум хуятәт па Ёмвош айләт ёх пәта «Dabro» немуп арәң ёх па Ёлка немуп арәң ими арисәт. Лыв айләт ёха мәстәты арәт «Юность», «На часах ноль-ноль», «Прованс» па арсыр сәма мәстәты арәт арисәт.



▲ *Айләт ёх вәндтыйлдәт*

» *Тәм әкмум тәхийн сырсыр проектәт айләт ёх ләщәтсәт, щит мұв-йиңк шавиман тәйты верәт, вошн вәлты шир верәт, креативной вәлупсы, тәлаңа-яма вәлты верәт, вәндтыйлдытты верәт па вухн нётты (продюсиро-*

вание) верәт. Иса грантәт унтасн айләт ёх 170 проект версәт, вуха ки пунты тәм верәт пәта 13 миллион арат вух мәсы. Арл пеләк айләт ёх пәта тәмәщ грант вән нётупсәт, елды мәнты пәнтәтә, елды верәт ләщәтты пәта

шеңк йма нётләт. Тәм тәхетн хуты вера вән нётупсы ши айләт ёха, мәта утәт лыв сахтәла рәпитләт па лыв вәлты вух ёша павәтләт, лыв вәлупсәл ләщәтты пәта па йма, тәса рәпитты, вәндтыйлдытты пәта, – путәртәс общественной, внешней связят па айләт ёх пила рәпитты департамент ух не Елена Шумакова.

Па и вер олаңән лупты мосл, тәм айләт ёх әкмум тәхийн Макеевка вош эвәлт юхтум нявремәт вәсәт (ДНР).

Тәм әкмум тәхийн вәлум айләт ёх вера йм нумәсн вәсәт, тәмәщ вер лывела вера сәма мәстәты вер. Па лыв ширелн Ёмвош щит шеңк хурамәң вош, хурамәң вәнәтәт мухәлая лодьләт. Ши киньца па тәм хәтләтн йм тәрум, хәтләң хәтләт вәсәт.

Путәр хәншәс:
Пётр Молданов



Сәх – щит Югра мұв мет тынәң хұл

Щи пәта кашәң лұң округевн тынәң хұл нйлкәт Лаңал па Ас хуща есәлдыйт.



Н. Комарова нявремәт пида хұл есәләл

Вәщ тыләщ 21-мит хәтлән Ёмвошн Лаңал хуща сәх хұл нйлкәт есәлты вер ләщәтсы, щит верты пәта мұв-авәт мосман тәйты нявремәт пида округ кәща не Наталья Комарова па Ёмвош кәща хә Максим Ряшин юхтыйлсәт. Тәмхәтл 3 грамм луваткем 140 щурәс сәх нйлак йиңка есәлсы.

Округ кәща не лупәс:

» 2018-мит одн мұң мұвевн вәлты хә Митхат Хасанов тынәң хұл нйлкәт йиңка есәлты вер олаңән лупәс. Щәлта мұң кәщайлұв немасыя поступсы ләщәтсәт. Хәлум ол мәр 11,5 миллион арат тынәң хұләт нйлкәт йиңка есәлсұв. Кашәң лұң сәх нйлак есәлты юпийн, алпа, елды щи тынәң хұл аршәка йил.

Нижнеобской территориальной тәхи кәща хә Иван Мотаев инщәссы, муй щирн лыв сәх хұл вантман тәйләт, юхлы лұв ястәс:

» Интәм сәх хұл Россия мұвев Вұрты непека хәншман вәл, щирн велпәсләты ән рәхл. Ин тәп немасыя хұл енмәлты тәхет еха щитәт катәлты рәхл, ләлн уша верты, щит нйлак эвәлт енмум хұл муй әнтә па па мосты верәт олаңән уша павәтты. Ин сәх катлум хуята имухты сұтытты вер пүншлы. Мұң, арсыр тәхет ех, и әрн щимәщ хуятәт вантман тәйлұв. Шаль, кашәң ол ар уголовной вер пүншлұв. Щи тумпи аршәк хуят уша верләт, хути щи тынәң хұл вәлты ән рәхл. Тәмхәтл нявремәт сәх нйлкәт Лаңал аса есәлты юхәтсәт. Вантә, лыв айтәлн мұв-йиңка сәмәңтәйты вәндтәлдыйт, щирн вәна йиләт па тынәң хұләт велпәсләты ән питләт. Щирн, алпа, хәнты сәх хұл Вұрты непек эвәлт йира вұды па йилпа мұң щи тынәң хұл велпәсләты па леты питлұв.

Путәр хәншәс: Людмила Гурьева

Ма нявремәт нарәсләты вәндтәлдум

Тәта мосванән, вәщтыләщ 18-мит хәтәлн, Ёмвошн округев творчества хотн «Торсапл юх ар сувәт» немуп ванлтусы вәс. Щи ут Фольклорной немуп хәтла мұң хущева юкәнтсы.

Щимәщ вер пәта ма немасыя щив йңхсум па хәнты муй вухаль нарәс сувәта айлат ех округев луватн вәндтәты хә Алексей Решиков пида вәйтәнтыйлдсум па лұв эвәлтәла щи олаңән айкел вұсум.

Алексей Александрович, муйсәр нявремәт пида нәң тәта рәпитләң?

► Тәм хәнты па вухаль мирңән нарәс юхәта вәндтәты тәхия мұң иса лапәт ол вұша юхтум нявремәт вұлұв. Вәна ювум пухәт-звет па вәндәт хәннехәйт ищиты юхтыйлләт па нарәсләты вәндтәйләт. Мұң арсыр нарәс сувәта лывел вәндтәйлұв.

Щи нарәс сувәт па муйсәр хәннехуятәтн сыры олаңн нух хәншыйт?

► Йис пурайт вұш эвәлт мұң шуши мирлұв арсыр нарәс юхәтн юнтсәт, щит нарәс юх, торсапл юх па нын юх. Сырыя Андрей Александрович Ангашупов Октябрьской район, Артём Григорьевич Гришкин Нуви сәңхум район эвәлт вәлум хәнты хәйңән па Григорий Николаевич Сайнахов, Каллистрат Петрович Лончаков па Николай Тимофеевич Пеликов Сұмәтвош район эвәлт вәлум вухаль хәйт шеңк хурамәңа па тәса нарәс юхәтн юнтсәт па мұңева сыр-сыр ар сувәт хәйсәт. Щи утәт унтәсн тәмхәтл мұң айлат пухәт па звет елды нарәсләты вәндтәйлұв.

Ма вәндтәты нявремәдәм күтн Марк Ромбандеев, Анастасия Гындыбина, Евгения Жемердиева шеңк яма юнтләт. Юхи хәщум олн арсыр кәсупсәтн нарәсләты



А.А. Решиков. П. Молданов вұюм хур

хәннехуятәт күтн лыв кәссәт па нух питсәт. Елды ма ищиты ай ех нарәсләты верәта вәндәты питлдум!

Путәр хәншәс: Владимир Енов



Муй вўрн нявремәт пўпи хот верәта

Ма ая вәдмемн пўпи хотәта тәтәдийдсаюм. Саш кўш ән тәйсум, мәнема вантты әмәщ вәс. Щәлдта вера ләңхасум луңәлтупәт верты. Әңкем-әщем нәтсәңән, әңкем вәндтыйлды непек верәс. Па щи верәта вәндтыйлды питсум.

Кәт шурәс ветхушь-яңмит олн, хән ма ветхушьяң тәдә йисум, мет оләң пўш пўпи хотн арисум па луңәлтупәт верты питсум.

Муй вўрн нявремәт пўпи хот верәта хушты, тәмхәтл ма щи оләңән еша путәртлум.

Мет оләң муй мосл

Ара питты пәта муй па луңәлтупәт верты пәта мет сыры мосл нявремән кўлы путәра па ар сувәта яма вәндтәты. Ма путәртлум, муй вўрн щит верты мосл. Тәм йилпа енумты нявремәт шимл ясаң тәйләт, итәх хуятәт па ясаң иса ән тәйләт. Тәп ишимурт ариты-якты лыв ләңхәләт. Щи пәта лывты вәндтәты мосл.

Арәт вәндтәты вер

Мет сыры ар сувәта питты мосл. Муй вўрн ар сувәта питты? Щи пәта арәт эвәлт кўлыя мәнты

ай ясаң пўлыет вўты па щи утәт нявремәта вәндтәты мосл. Щи юпийн па ар сув пида щи ясаңт нявремәт пида хошты хуятн ат аридыйт. Ма хушәма щит ащи вәс. Щиты аритыйн мулды пўпи хота мәстәты верәта хушты мосл. Хопн довәлды муй па вәнт хўват шәшты, муй па әхәлн наврәлтәты. Щи ай ясаң пўлыет мет оләң вәндтыйлды питтәлн нявремәт хўв мәр ат аридәт. Мет сыры, ма щиремн, тәм хурасуп арәт мосләт. Хән ясаң шимл, сый ар.

Меңкәта юхан ар (ай пўлие)

Нявремәт ат хотхәрия омәсләт па хопн мәнты щира ат довәлдәт. Ләп юкана сўвәт ат тәйләт. Хопн омәсман, довәлман па няхман щиты щи ат аридәт.

Сыры и ясаң кәр вўты:

– Меңкәта юхана,
Меңкәта юхана,



▲ Нявремәт пўпи хот вантләт, 2010-мит ол

Ха-ха-ха-ха-ха-ха..
Ха-ха-ха-ха-ха-ха..
(ха-ха-ха верты артән ясаң нәмәлмәләт).

Щәлдта па кимәт ясаң кәр:

– Ләңхәта юхана,
Ләңхәта юхана,
Ха-ха-ха-ха-ха-ха..
Ха-ха-ха-ха-ха-ха..

Щи юпийн па и ясаң па кәрәтты па яха верты:

– Меңкәта юхана,
Әмәңа юхана,
Меңкәта юхана,
Әмәңа юхана,
Ха-ха-ха-ха-ха-ха..
Ха-ха-ха-ха-ха-ха..

Муй па тәмиты:

– Әмәңа юхана,
Ләңхәта юхана,
Әмәңа юхана,
Ха-ха-ха-ха-ха-ха..
Ха-ха-ха-ха-ха-ха..
(па елды па ищиты).



▲ Айлат әх «Аньхи» луңәлтуп вантләләт, 2015-мит ол



▲ Айлат әх якләт, 2010-мит ол



ХУЦТЫ

Тәмиты арсыр шири хәлүм ясаң кәрәтман ар ши тывл. Тәмиты ар сува нявремәт хуцты пищ вәл.

Тәта тәп хәлүм ясаң кәр тәп вәл: меңкәта юхана, дәнхәта юхана, ёмаңа юхана па щитәт йха кәрәтман няврем ар ши тывл. Тәмәщ вер шәпиет мухты дыв ар сува ши питләт. Арсыр арәт эвәлт ищиты тәмәщ пұлыет кәншты мосл. Муй па немәсыя тәмәщ ар пұлыет верты мосл.

Луңәлтупәт вәнлтәты вер

Куй-куй луңәлтуп
(Куй-куй – щит пеньшар сеңкты сый).

Кәт хә ән рәхты тә-хийн велпәссәңән муй шәшсәңән па щәта и хәйл йх сәврәс. Юхи юхәт-сәңән, ин икел нявремәл вера мәша йис. Муй тәхи эвәлт мәшн юхәтса? Ши вер уша верты пәта лын пирәщ щатыщәщел хуца мәнсәңән, лүв щәртәң ики вәс. Щитн ши күш кашашәс, тәп поңх таклы ән пәкәл. Щирн ши хилә-ңән поңх кәншты ши мәнсәңән.

Хиләңән:

- Тёмка-порска,
Тёмка-порска,
Хәлүм поңхев,
хәлүм поңхев.
- Тёмка-порска,
Тёмка-порска,
Хәлүм поңхев,
хәлүм поңхев.

Тәмәщ ясаң кәрәт луңәлтупн вера ар, щитәт айкемн вәнлтәты мосл. Ши поңх вәйтсәңән, пирәщ икел хуца юхәт-сәңән.



▲ Айдат ёх луңәлтуп як якләт, 2015-мит ол

Пирәщ ики па арийл:

- Куй, куй, куй,
Хәлүм поңхев, куй,
куй, куй.
- Сери сем вой куй,
куй, куй.
- Хәлүм поңхев, куй,
куй, куй.
- Хилыеңән, куй, куй, куй.
(– Әнтә, ән тывл, па поңх мосл).

Ши юпийн хиләңән па мәнләңән, лапәт поңх тәлңән, па ши немәлт ән тывл. Хиләңән па ши «Тёмка порска» вер-ләңән:

- Тёмка-порска,
Тёмка-порска,
Лапәт поңхев,
лапәт поңхев.

Пирәщ ики па арийл. Тәп тәм арәд щирн па пасырашәк па хұвашәк мәнл:

- Сери сем вой куй,
куй, куй.
- Лапәт поңхев, куй,
куй, куй.
- Хилыеңән, куй, куй, куй.
- Кәши вәнтәр куй,
куй, куй.
- Хәщ па вантлүм куй,
куй, куй.
- (– Әнтә, ән тывл, па поңх мосл).



▲ Айдат ёх пұпи ар ариты ләмәтьляләт, 2015-мит ол

Щәлта хиләңән мән-ләңән, хәс и поңх тәлңән. Па ши «Тёмка-порска» верләңән. Щирн ши пирәщ ики ториты питл, нух навәрты питл па иса вер-рәт ши шиваләллә. Пирәщ ики па арийл. Сыры ариюм ар пұләл елды тәлдә:

- Кәши вәнтәр куй,
куй, куй.
- Мәшәң нюхи куй,
куй, куй.
- Хәс и поңхев, куй,
куй, куй.
- Тәрум нәрәң куй,
куй, куй.
- Мәшәң нюхи куй,
куй, куй.

Ёмаң сәңхум куй,
куй, куй.

Тәрум нәрәң куй,
куй, куй.

Оңтәң хори куй,
куй, куй.

Ши, йир тұваты-ы,
йир тұваты-ы...

Тәмиты, ма щиремн, нявремәт пұпи хот верә-та ши айкемн вәнлтәт. Тәп мет олаңән дывела кен ясаңәт, кен путрәт путәртты мосл па ши кен ясаңәт, кен путрәт ар сувәт пида айдтыева дывела вәнлтәты мосл.

Путәр хәншәс:
Пётр Молданов



Йис пурмасат лавалман тайлат

Вэщ тылащн, хэн Ваньщават кэрт ёмаңхатл постасы, кэртәң неңәт хәшапәт ванлтупсийн кәссәт. Лүв хәшапәт йирсәт па шив сыр-сыр йис пурмасат пунсәт, мәта утәт опращдал эвәлт хәщсәт. Щит арсыр йис карты анәт, тунты эвәлт верум утәт, ёнтум ёрнасәт, щәшкан сәхәт, севум вейт, посәт па па арсыр әмәщ пурмасәт.



▲ О.В. Акушко



▲ Аңкелн верум хушапәт



▲ Воньщупәт

Ольга Владимировна Акушко (Гындышева) ин Ямал мұвн Ноябрьск вошн вәл, тәп кашәң лүң рәт кәртәла юхтыйл. Лүв кәртәң ёмаңхатләтн иса вәлдял па верәнтты кәсупсәтн кәсл. Тәм хәтләң лүв Татьяна Никитична Гындышева аңкел тунты эвәлт верум пурмасәт ванлтәс, щит хушапәт, йиңләт, вән па ай воньщупәт. Тәм пурмасәт 50 мултас ода йисәт.

Ищиты Ольга Владимировна сәк эвәлт верум хурамәң щүңкәт тәс, щитәт лүв версәлэ. Лүв лүпәс, хуты сәк кәртәтты ай пура вүш эвәлт хошл па тәм вер лүвела мет мәстәл.

Мослупты, хуты Ольга Владимировна Ноябрьск вошн 35 ол вәл. Олңәлн лүв пәщта хотн рәпитәс, ин пенсияя мәнәс па музей хотн рәпатнека вәл. Айкемн, хән немәлт

верты ән мосл, сәк кәртәл. Сыры оләтн лүв «Вүрты эвиет» ариты-якты тәхийн хәнты арәт арийс па якәт якәс. Пилдәңдал пила арсыр вошәта па мұвәта ариман па якман йәңхсәт. Ин тәп итәх пурайн йәха әктәщийлдәт, хән вошәң ёмаңхатләта вохәнтлүйт па күлупа, әшколая муй па ай пушхәт лавәлты хота йәңхләт. Нявремәта шуши мир культура верәт оләңән ай

павәтләт па хәнты мир пурмасәт ванлтәләт.

Вера Никитична Тимиргалеева (Молданова) ищи хәшап йирәс. Щив лүв Раиса Егоровна Молданова аңкел па Афанасий Алексеевич Молданов щатьщәщел эвәлт хәщум пурмасәт пунәс. Щит ищи тунты па юх ләр эвәлт верум анәт-сәнәт па йиңләт. Ищиты аңкелн ёнтум ёрнасәт па щәшкан сәхәт ванлтәс.



▲ В.Н. Тимиргалеева хиләл пила



▲ Нохәр юх ләр эвәлт верум хушап



▲ Р.П. Гришкина



▲ Ақтум пурмәсдә. Н. Вах верум хурәт

Вера Никитична ин ищи ёнтәсты питәс, хилыдада па хилнедада ёрнасәт ёнтәл, сәк эвәлт кәрәтл па севум вейт па посәт тыйл. Ин вән Стелла эвел ищи айкемн ёнтәсты вера күншемәты питәс.

Вера Никитична няд эви ёнмәлтәс, хилеңа йис. Лүв ар ол пәльницайн санитаркая рәпитәс. Итәх пурайн, тохтур воша яңхты пурайн, лүв кәртәң мира нәтл, няр нюлмәт пуртәнән нерл па йирл, вән нюлмәт яха ёнтәлдә, муй верты иса хошл. Лүв әңкел иты – шеңк рәпәтаяң нә.

Руфина Прокопьевна Гришкина (Кондина) ванлтупсыя хәнты ёрнасәт па щәшкан сәхәт, катра хурәт, йис пурмәсәт тәс. Щи ёрнасәт па щәшкан сәхәт хәнты әңкел Софья Константиновна Кондина (Гындышева) па вәнтупәл, Евдокия Тихоновна Юмина (Гришкина) ёнтсәңән. Ищиты лүв катра хотн ай ёрнасые вәйтәс. Тәм ёрнасые вәнтупәлн ёнтсы, хән Саша пухәл сема питмал, Алек-

сандр Васильевич Гришкин ин Руфина Прокопьевна икел. Икел тәм ванән ай нявремәт пәта пойтәк хир эвәлт сый верты юнтут верәс, щив дыпия лүв хәш юх семәт пунәс.

Шәлдта Руфина Прокопьевна панне сух эвәлт Евдокия Тихоновна вәнтупәлн ёнтум хирие ванлтәс, щив хәнты шар пуныйлсы.

Щи пурмәсәт күтн кәт йис онтуп вәс. Щи онтупәтн дыв енумсәт, нявремәд па хилыдада па улсәт. И онтуп – хәтл мәр улты пәта, кимит онтуп – атәлн улты пәта.

Ищиты ванлтупсыя лүв мевл лопсәт тәс. Щит ищи вәнтупәл ёнтум утәт, ай юлн ёнтсәлдә, ән па кәлдәт. Тәнял Руфина Прокопьевна итәх пурмәсдәл Ёмвоша ванлтупсыя китыйлсәлдә.

Йис пурмәсәт тумпи ванлтупсыйн катра хурәт шивәдәты рәхәс. «Победа» колхосн рәпитум хуятәт хура вүйман вәсәт. Ищиты сыр-сыр ишәкты непекәт, мата утәт әщел колхосн



▲ Турлопәс ванлтәл

рәпитмал пурайн ёша холумтыләс. Щи мойлупсәт күтн пәтәрух шайпүт вәл, щит әщелә соцсоревнования щирн нух питылум пәта мойдылсы. Щи мойлупсы вүты пәта әщел Тюмень воша яңхәс.

» *Ма щи йис пурмәсәт лавәлман тәйләлдам, мата утәт әңкилүв па ащилүв эвәлт хәщсәт. Ма елды па щи пурмәсәт әкәттты питлүм, дәлн хәнты нявремлүв па хилылүв щи пәда вантман, рәтләл вәлупсы уша ат версәт, – лупәс Руфина Прокопьевна.*

Лүв ар ол ай пушхәт хәтл мәр лавәлты па тәйты тәхийн рәпитл. Ин садик әшкола пида яха кәрәтсыйңән. Тәнял лүв пилнедал пида щәта ай музей тәхи ләщәтәс, хута хәнты мир пурмәсәт әкәтсәт. Щи оләңән ма елды атәлдә хәншлүм.

Щимәщ неңәт Ваньшавәт кәртән вәлдәт, рәт мирел йис верәт, әңкилал-ащиләл йис пурмәсәт шавиман па лавәлман тәйләт.

Путәр хәншәс:
Надежда Вах



Сүмәтвош нявремәт рүтьщәләр па щолн юнтләр



Людмила Новьюхова хәнты мир пурмәсәт нявремәта алял

Муй щирн Сүмәтвошн нявремәт рүтьщәсәт

Шуши мирәт верәнты па ёнтәсты тәхи, мата ут Сүмәтвош районной хотн вәл па рәпитл, кашәң лүң пурайн сыр-сыр ванлтупсәт нявремәт пида немасыя ләщәтл. Вантэ, лүң тылщәт мәнты мәр Сүмәтвошн сыр-сыр айлат ёх рүтьщәты тәхет вердыйт.

Шуши мирәт верәнты па ёнтәсты тәхи ёх тәм ол лүңән ищиты ар щирн Сүмәтвошн вәлты, лүң мәр

рүтьщәты ай нявремием пида яма па вешката рәпитсәт.

Щиты прикладной творчества па нацио-

нальной культура хотн вәлты неңәт немасыя рүтьщәты айлат пухәт па эвет пәта хәнты па вухаль ёх вәлты-холты щирәт,

вой-хүл, вепләсләты, рәт ясәл муй литератураел олҘҘн сыр-сыр хурамәң ванлтупсәт тәса па тўң-щирәңа версәт. Елды Сүмәтвошәң пухәт па эвет арсыр әмәщ мастер-классәта тәтәлясыйт, хута шуши мир пурмәсыет верты вәндтәсыйт, сыр-сыр ванлтупсәтн вәсәт па хәнты муй вухаль юнтәтн па юнтсәт.

Мосл лупты, хути нявремәт шеңк әмща тын-щәң вўлы оңтәта ёвәлсәт, вўлең әхләт шәпи, кәсты щирәтн, ямсыева навәрсәт, әхәл эвәлт тәса нәләр поса есәлсәт. Ар пеләк айлат хәннехә немасыя хәнты па вухаль мирнән пәта ләщәтум пурмәсәң ванлтупсыя юхтыйлсәт па уша версәт, муй щирн катра пурайн шуши мирнән тәм увәс мўвевн вәсәт.

Щи пәта Сүмәтвош прикладной творчества па национальной культура хотн вәлты неңәт «Хәтлые» немуп хәтл мәр ай нявремәт лавәлтл хота йңхты пухәта па эвета «Быт обских угров» немуп хураcәң ванлтупсы лыв хущәла версәт. Айлат пухәт па эвет, илем хот йит эвәлт кимит хот йита питман, ямсыева хәлән-



Калерия Супрун Сүмәтвошәң ай нявремәт щолн юнтты щирәта вәндтәл



Любовь Вынгилева нявремәта хәнты па вухаль мирнән пурмәсәң ванлтупсы ләщәтл



▲ Ай эвет сорт хўд ух лўвāt ванлтāt



▲ Калерия Супрун, Людмила Новьюхова па Любовь Вынгилева – Сўмātвош шуши мир хотн рēпитты неңāt

сāt па уша павātсāt, муй ширн йис пура вўш эвālт па ин тām хātлāt вўш вēнты хātтэт па вухалят тātа вēлупсы ширлāд лēщātсāt па елды вēsāt.

Мет шопāң ай нявремātа эмща йисāt, муй ширн шуши мирāt нуры версāt, тўт āлды, пўт кавāртты щухалāt тēса па ймсыева вушлāх па кармас йўхāt унтасн ийхā āкātсāt. Айлат ēх хēлāнтсāt па ванлтсāt, муй ширн хātтэт, вухалят хўд велпāслāты ширн кашāң пурмās пида рēпитсāt.

Ар пелāk щимāщ пурмāsāt шуши мирāt вєрāнтты тāхия немасыя Сўмātвошāң хāннехуятāt āл щиты мойлāсāt.

Щāлдта методиста рēпитты неңāt нявремātа альсāt, муй ширн пўнāң муй щāшкан сухāt эвālт сыр-сыр юнтутāt верты рāхл, хутыса щимāщ йм лēmātсухāt ēнтсыйт па хурамāң хāншийн пунсыйт. Мет юхи хāщум пурайн пухāt па эвет «Муй ширн пелāйт тывсāt?» хāнты мир моньщ хēлāнтсāt. Вантэ, кашāң ванлтупсы сухāнтты кемн шуши мирāt тāхийн рē-

питты неңāt немасыя айлат пухātа па эвета хурамāң моньщāt моньщлāt.

Щимāщ эмāщ ванлтупсэт йма Калерия Супрун па Людмила Новьюхова тām лўң тылщātн Сўмātвошāң рўтьщāты ай нявремийет пида лēщātсāt.

Щи тумпийн тām йисн шуши мирев тāхи бюджетной социальной верāt тēты «Альянс» немуп хот хуца ин вēлды айлат па вēнлат хāннехуятāt пида па арсыр ванлтупсэт муй вейтантупсэт тēса па верл.

Вēщ тылāщ 12-мит хātлн прикладной творчества тāхи хуца рēпитты Андрей Албин па Любовь Вынгилева айлат муй вēнлат мēшāң хāннехē пида хāнты па вухаль мирāң юнтутātн юнтсāt. Сырыя дыв путāртсāt, муй хурасуп юнтты ширāt шуши хāннехēйт тāйсāt, муй ширātн щитāt тўң-щирāңа лēщātсāt па ēхāt юнтты вўянтсāt. Щиты «Нумсāң юнт» вер ванлтсāt па ийха нēmāссāt, муй ширн па елды «Ветлов» немуп юнтэл уша верты. Кашāң нявремийа муй вēн хāннехēя шеңк эмāщ щи вер вēs.

Щи пāта дыв путāртсāt, хуты елды вēлды щирелн ищиты тāmāщ юнтāң вєрātн мет сāmāңа юнтты пилтāt. Щāлдта тām юнтутāt ищи дывел вейтты арсыр хāннехуятātа айн-айн ймсыева альты вўянтлāt.

Хātтэт па вухалят, вантэ, йис пурайт вўш эвālт ймкем арсыр эмāщ юнтутāt па юнтты ширāt тāйлāt. Мет сāmāң юнтута ай эвет кўтн ищипа акань па аканьлāты верāt тām кāt мир хуца лўңātлыйт. Щи пāта Сўмātвош шуши мирāt тāхийн рēпитты не Влада Захарьянц вошāң рўтьщāты эвета немасыя акань верты ширāt ванлтсāt. Сырыя лўв путāртсāt, муй ширн катра пурайн аканят кашāң хоттел, ēх хуца лēщātсыйт па тāйсыйт. ēхāt кашāң ай эвие лўвела щāшкан сух эвālт хурамāң акание лēщātсāt.

Ай пухātа па альсы, муй ширн тунты эвālт юрн хот па вўды хурасāt верты рāхл. Сыры ин нявремāt ийха тунты эвālт юрн хот версāt, ēхāt кāt тāхи ширн лакки мāнсāt па вўды хурасāt тунты эвālт лēщātсāt. Мет ай пухāt па эвиет дыв кўтэлн олупн

хурāt нерсāt, хуга хāншсāt, муй ширн па хутыса дыв тām лўң мār Сўмātвошн вēsāt па рўтьщāсāt.

Мет юхи хāщум кўтн Сўмātвош шуши мир тāхийн рēпитты не Любовь Вынгилева рўтьщāты пухātа-эвета «Муй ширн сорт хўлэн лўвела ух вєрās?» моньщ лўңтās. Щāлдта лўв нявремātа ванлтсāt, муйсār лўват сорт хўд ух лыпийн вēллāt. Щиты пухāt па эвет уша версāt, муй араткем хāннехē хурасуп лўв сорт хўд ух хуца вēл. Па моньщ ширālн, мātты щи хуятāt иса лыкāң сорт хўлн юхи давемāсыйт.

Щиты шуши мирāt вєрāнтты па ēнтāсты тāхи ēх тām лўңāн рўтьщāты ай нявремийет пида Сўмātвошн вєс па рēпитсāt. Ар пелāk хāннехуятātа ай пухāt па эвет пида тātа шеңк эмāщ рēпитты вēs. Йилпа юхātты олātн тātа вēлды неңāt айлат ēх пида вейтантыйлды па нумās тāйлāt.

*Любовь Вынгилева айкелāt хāнты ясāңа тулмащтās:
Владимир Енов*



Сэрханл мўвн вэнт шушетн єнумты ханты эвиет айтелн єнтасты, шўкщаты вєнлтэлыйт, яма рэт ясэңан путэртлэт. Шимэщ айдат неңие пила ма Ёмвош район Согом кэртан вэтаня йисум, щит Светлана Покачеева.

Ханты мир йис вэлупсы яма вэлдэ

Там айлат не Согом кэрта 2009-мит одн юхтэс, тата 10-11-мит классэңан вєнлтылдэс.

Рэт мўвэл – Сэрханл район Таурова кэрт. Интам щата тэп яңкем хоттел єх вэллэт. Светлана ясэңдал щирн, айлат єх вєнлтыылты мэнлэт па юхи ан керлэлэт. Вантэ, щата интам леккар хот, ашкола, нявремэт тайты хот антэм, щирн рэпитты тэхи ан тайлэт. Тэп лэпка па нуви тўт мэты тэхи рэпитлэңан. Щата вэлты єх вой па хўл велпэслу-ман вэллэт.



▲ Светлана Покачеева икел па пухэл турн лэщэтлэңан

Светлана вэн ханты семьян сема питэс. Аңкел-ашел-Юлия Фёдоровна па Виктор Васильевич Покачеевэңан – хўл велпэслуман вэллэңан, вет няврем єнмэлсэңан. Щиты Светлана Викторевна лупэс:

» Вэнт шушев пўңалн Вэн Юхан па Ай Юхан увлэңан. Щата вэлты мир вўлы ан тайлэт. Ая вэл-мем вўш эвэлт нэмлем, хэнтэт вой па хўл велпэслэсэт. Тэп сыры ар хўл вэс. Эхэт олэти юханэн шимл хўда йис. Лыв холуп омэслэт. Щит хурамэң па сыстам мўв, рэт кэртэм мосман тайдем.

Светлана вєнлтыылты Угут воша китсы, кэртэлн ашкола антэм, щирн иса нявремэт Угутн вєнл-тыыллэт, интернатн вэл-лэт. Яртыяң класс вэнты щата вєнлтылдэс, щалта Согом кэрта елды вєнл-тыылты мэнэс. Ихущьяң мит класс етшуптумал

юпийн Ёмвошн вєнлты-лдэс, щалта икеңа йис па щит тэхи ан етшуптэслэ. Хэлум ол мэр Сэрханл район Каюково кэртан интернатн воспитателя рэпитэс. Эхэтшак Шадринск вошн заочной щирн нявремэт вєнлэты неңа вєнлтылдэс. Интам лўв икел пила Согом кэртан вэл, 2020-мит одн диплом непеке еша павтэс па имухты нявремэт хэтл мэр тайты хотн воспитателя рэпитты питэс.

Икел Михаил Владимирович Сургучёв ищи ханты хоттел єх хуши єнмэс. Лўв ашколайн хот лавэлты хэя рэпитл, ищи айтелн хўл велпэслэты вер пелы сэман. Пилэңан юлн хот войт тайлэңан – ошат па не щичкўрекэт. Лўңан па сўсн тулэх па воньшумут акэтлэңан. Лын хэлум няврем єнмэллэңан. Светлана Викторевна сорни ешэңан тайл, лўв айтелн ханты лэмэтсух єнтэл, щит вера аңкелн вєнлэтысы:

» Ащем вой велпэслэты хэя рэпитэс, щирн юлн аңкем па упидам пила вой сух танэлсўв. Щалта вой сух эвэлт нымэл версўв, вейт, нюки вейт, посэт єнтсўв. Щит тумпи аңкемн нэй сэх єнтты вєнлэтысыюм, сакн хурамылэсэв. Аңкем-ащем юлн ин вэнтты тэп ханты лэмэтсухн яңхлэңан, рэт ясэңан путэртлэңан. Вўлы ан тайлўв, щирн шовэр, вухсар, нюхэс вой сух эвэлт сэх, мил єнтлўв. Щит тумпи нявремэлама, икема посэт па носкет тыйлум. Ай пураёмн аңкем пила товийн тунты акэтсўв, щалта воньшупэт па па арсыр анэт-сэнэт тунты эвэлт єнтсўв. Щалта щит утэти хурасэт хэншсўв.

Светлана ясэңдал щирн, Таурова кэртэң мир ин вэнтты ханты мир йис верэт лавэлман вэллэт. Щата община рэпитл, ханты мир щив хўл, вой сух, воньшумут, тулэх

мэлэт, щиты тылэщ вух еша павэтлэт. Таурова кэрт Угут вош эвэлт хўвн омэсл, щив лўңан хопн нивл, щос мэнтты мосл, тэлн «Буран» немпи тўтэң эхэлн ищи нивл, щос мэр мэнлэт.

» Аңкем-ащем вэнтэн тэл хот тайлэңан, щив тэп тэлн вой велпэслэты яңхлэңан. Ащем лыс, сэсы вантман яңхэл, аңкем летут кавэртэл. Щата ванэн юхан антэм, щирн аңкем лоньщ лудтыйл. Лўв хўл эвэлт еплэң летут кавэртты хошл, ин щит летут такды шеңк мэрэмэлыюм. Ма ин Согом хуши хотэң ехлэм пила вэллум, щирн муртэңа аңкем-ащем хуши яңхийл-лум, телефон хўват путэртыйллўв. Щив хўв мэр мэнтты мосл, ай нявремэм тэп и ола йис. Еша єнумл, щив мэнлўв, – лупэс Светлана Покачеева.

Путэр хэншэс:
Надежда Рагимова



Сандринят хоттел, ёх

Там ванан мун, редакцияева Ямал мув Лорвош район эвалт Сандринят хоттел, ёх мойна юхтылдсат. Шит апран, ханты айлат хэ Иван Сандрин аңкел-ащел па апщел. Лув олцелдн тэнял, хэтмит газетаевн ханшсүв. Мун, шай яньщман вэлупсэв олаңан путартсүв.

**Эдуард Романович
Сандрин:**

» Мун, Сандрин опращнемев олаңан щиты лупды, мятты ки кат ясаң эвалт опращнем тывас – сан па торап (туруп), мосаң, опращев шар талты мосман тайс. Па ёх ястадлат, хуты мун, вэн опращев Сандр вэс, щит эвалт Сандрин рэт тывас. Мун, рэтэв Кевават кэрт эвалт йил. Катра Кевават па Йилуп Кевават кэрт-ңан ванан Ас хонаңан омаслаңан, күтэлн лапат-кем верста вэл. Щитңан Муши кэрта луңман вэллаңан. Вэн щатьщасцем довн тыведт-тухелт мосты летутат-пурмасат тэтыяс. Катра пурайн Йилуп Кевават вэн кэрта вэс, щата лапка, нянь верты хот, ай ашкола, кўлуп вэс, ин хэлум-няд пираш ёх вэлдлат. Тэп дун, пурайн дыв хущеда няврэмдал па хилыдал мойна юхтылладт.

Мун, семьяевн лапат няврэм вэс. Ма тащ хотн сема питсум. Ащем Роман Иванович Сандрин, аңкел Евдокия Семёновна, эви опращнемд Лонгортова вэс, лув Щаня мув эвалт вэс. Пулцават вошн айлат ёх ханты ясаңа вэнлтаты ими Нина Михайловна Егерь (Сандрина) маретем.

Ма Мушийн 10-мит класс вэнты вэнлтыйдсум, интернатн вэсум, рутьщаты пурайн ащема вуды тащ давалты нетсум. Ашкола юпийн ма еша «Мужевской» вуды тащ

хуца рэпитсум. Щалта армия мансум, мет сыры Мордовияйн, щалта Белоруссияйн сапера служитсум. Щит пурайн итэх ма пилема служитты солдатлув па хон пелак Афганистан мува даласты китсыйт. Служитты пурайн щимаш вэр вэс – шашка-патрэн похнемас, щит юпийн вевтама хэлты питсум, хэлмит группа машаң хэя йисум. Ин немасыя хэлантты шунк унтасн яма хэлдум.

Юхи кердасум па Пулцават вошн зооветтехникум етшуптасум, щит юпийн 35 ол вуды ямалман рэпитсум, ин рутьщадум. Советской дащ пурайн Лорвош районан вэн тащат вэсат, ин ая йисат. И нуша – айлат ёх вуды тащ давалты ан данхалат.

Там йисн Ямал мув шуши мир верат тэты департамент па Лорвош район кэщайт вудец ёха яма нетлат, мосты пурмасат па па утат лэглат.

Катра пурайн дунан мун, Лорвош район вудец ёхлув тащдал пида Коми мува касалдсат, ин ан рэхл, щит олаңан район кэщяева пицма юхтас. Щирн ин Кев пунадн тащат даваллыйт.

Мун, хущева «Мужевской» па «Горковской» вуды тащ давалты тэхеңан вэлдлаңан, щирн кашаң товийн и ол Мушийн, па олн Овкертан вуды ёх ёманхатл дэщатлы.



» Сандринан именең-икеңан

Ма итэх йис ханты верат вейтлудм. Там ванан Ханты-Мушийн Пупи якхотн вэсум.

**Марина Васильевна
Сандрина:**

» Ма эви опращнемем Пырысева, ван хатлуп тылащ 15-мит хатлан 1966-мит олн сема питсум. Аңкел Ульяна Николаевна Тарасова Асов кэрт эвалт вэс, ма ая вэсум, хэн лув антэма йис. Ащем Василий Алексеевич Пырысев. Мун, семьяевн хэлум няврэм вэс, яём хул велпаслудман вэл, апщем Мушийн пуртанат тыныты хот кэщяя вэл. Мун, Ямкертан сема питсүв, Овкертан интернатн вэсүв па ашколайн вэнлтыйдсүв. Яң класс етшуптумем юпийн Пулцават воша мансум па культпросветучилищайн ол шэп киникайт лунатты хотн рэпитты вэнлтыйдсум. Аньхем машитты питас, щирн вантман тайты па нетты мосас – юхи кердасум. Вантэ, ащем янмит пиркатайн пиркатаира вэс, апщем вуды тащ давалдс. Ма юлн хашсум, пельницайн хотхэры длохатты

неңа рэпитты питсум. Дхат икем пида вейтан-тыйлдсум, икия мансум, щит юпийн мин ийха вуды тащ давалды ёх пида касалдсумн. Мун, семьяевн хэлум няврэм: Иван, Вячеслав па Анна. Аня – шэкащты эвие, айтелдн мун, семьяевн енмал.

Аня Талигина:

» Ма Ваш юхан ов (Восяхово) кэртан ашколайн нивалдмит класс етшуптасум. Щата Раиса Александровна Конева муңев ханты ясаңа вэнлтат.

Ма айтелдн вантсум, муш щирн ащем вудэта мосты пуртанат лоньщтал, лекщитал. Ма ищи ашкола юпийн Пулцават воша манлум па щата многопрофильной колледж хуца ищи щит вера вэнлтыйлды данхалум.

Ин мун, Иван яём пида Ёмвоша мойна юхатсүв. Шеңк хураман вош! Мун, «Торум Маа» музейн вэсүв, шеңк мастас.

Путар ханша:

Людмила Лонгортова



Тәмхәтл ма ар ол Асов кәртән вәлты хәнты ими Матрёна Макаровна Серасхова олаңан хәншты дәңхалум. Лүв савр-вавр ими, тәп мулды верты вохлы, имухты йил. «Лапәт эви» ариты тәхи ләщәтум пурайн тәм хәнты имие мет сырыя щив юхтәс.

Каркам кәртәң имие

Ма лүв пиләда «Ван рәтәт» немпи фестивал пурайн вәйтантайлдсум. Лүв ши пурайн ариты тумпи кәртәң иметн верум арсыр хурамәң пурмәсәт эвәлт ванлтупсы ләщәтәс. Вәлупсәл олаңан щиты путрәд олңитсәлэ:

» *Ма Щаня юхан мүй эвәлт. Ащем – Мака Сергеевич Пырысев – Ямкәртәң хә, аңкем – Евдокия Михайловна, эви опращнемл Русмиленко вәс, лүв Сорт юхан эвәлт Горки (хәнты щирн Йилуп) вош эвәлт. Ма васы мәнты тыләщ 9-мит хәтлән 1962-мит олн сема питсум. Мүй семьяевн вет няврем вәс, Ямкәртән енумсүв. Ин хәлум хуят хәщәс.*

Ашкола етшуптумал юпийн айлат Матрёна имухты рәпитты питәс. Ешавәс Фёдор Ильич Серасхов хуши икия мәнәс. Лыв семьяедн хәлум эви сема питсәт. Яң ол яма вәсәң, шәлтә кәтна мәнсәңән. Икел рәт Катравош хуша вәлты хәщәс, Матрёна Асов кәрта касдәс. Немасыя пүт кавәртты неңа вәндтыләс, ши вер хүват хәлмит па нәлмит разряд тәйл. Щирн лүв тәта ар ол ашколайн нявремәт пәта епләң летут кавәртәс, ин рүтьщәл.

Наталья па Галина эвәңәл аңкел иты айтәдн ариты-якты вер сәмәңа тәйләңән, щирн ин культура хотн рәпитләңән.

Любовь эвел Горки кәртән хәтл мәр ай нявремәт хотн воспитателя вәд. Лүв елды вән непек холдмтты щира университет етшуптәс.

Асов кәртән Матрёна Макаровна Карл Васильевич Носкин пила вәйтантайләс, мой версәңән. Йилуп семьяйн хәлум няврем сема питәс. Икел хүл вәлпәсдәты хәя вәс, ипүш холпәт вантты мәнәс па юхлы аң кердәс – йиңка питәс. Шәкащман вәс, атәлт лавәрт нявремәт енмәлты. Ям арат ол юпийн лүв Андрей Анатольевич Маклаков пила вәйтантайләс, яха вәлты питсәңән, лүв ащи иты нявремәт енмәлты нәтәс. Ар ол яма вәсәт, шеңк шаль, ям арат ол юхлы лүв сәм мәшн антәма йис.

Матрёна Макаровна ар ол Асов кәртән вәл, щиты путрәтәл:

» *Асов карта юхәтмемн ма имухты шивәләсум – муйсәр хурамәң тәхийн вәд. Тәм хәнты кәртые пәхәр хуша омәсл, тәта ар нохәр юх енмәл, щирн Вайбер па Ватсап хуша мирн кәртәң чат «Нохәр пәхәр» немн пунсы. Щәта арсыр мосты айкеләт хәншлүв.*

Йис путәр вәд. Хәнты вән йиңк пурайн тыв и хәнты ики юхтәс, немл Тарас Тарасов вәс. Лүв эвәлтәда елды Тарасов рәт мәнәс. Степан Алексеевич Тарасов 1871-мит олн сема питум хә, Кушеват кәртән Тәрум хотн кәт класс етшуптәс, ши юпийн ар ол Асов



Е.А. Шульгина па М.М. Серасхова

кәрт кәщая вәс. Ши тумпи лүв пәтлам хот щәртәң икия вәс. Тәта Ащтепан ёмәң нёл вәл, кәртәң ёх яма вәлты пәта щәта поры верләт.

Асовн кәртәң мир худыева рәпитләт, итәх хуятәт бюджетной тәхетн, икет «Азовской рыбоучасток» хуша хүл вәлпәсдәләт, рәпатайлы ёх антәм. Ям арат ол кәртәң кәщая Ольга Геннадьевна Жернакова рәпитл. Юхи хәщум оләтн ар йилуп хот омәсты питсы, йилуп вош хүлэт тывсәт. Йилуп кәт нартупәң кирмәщ хот омәссы, щәта хәтл мәр ай нявремәт тәйты хот вәл.

И вер атум – айлат ёх вән непекәңа йитәл юпийн юхлы аң кердәләт. Вантә, па кәртәт иты тәта бюджетной тәхет тумпи рәпата антәм. Щирн кәртәвн айдтыева мир шимла йил.

Матрёна Макаровна – савр-вавр ими. Лүв хәнты

имет пила «Лапәт эви» ариты тәхийн арийл, якәл, етнхотәт алял. Ёмәңхәтләт пурайн лүв имет пила ванкүтлди Лорвош район арсыр кәртәта, Пулңавәта яңхийл. Тәм лүңән «Лапәт эви» имет Ямал мүй хон воша «Душа тундры» па Мушийн вәлум «Ма Лорвош районем» немпи ёмәңхәтлңәна яңхсәт.

Асов кәртәң имет күлуп хотн ай эвет хурамәңа ёнтәсты, хәншәң вейт тыйты, сәкәң түрлопсәт кәрәтты вәндтәләт. Тәм ванән сорни ёшуп имие Елена Алексеевна Шульгина нявремәт тунты ләщәтты, кавәртты па ши юпийн арсыр утәт верты вәндтәс.

Матрёна Макаровна 30 ол рәпитум олдал тәйләлэ, ин рүтьщәл. Яма па тарма рәпитмад пәта арсыр ишәкты непекәт тәйл.

Путәр хәншәс:
Людмила Шульгина



Муй верты мосл, хэн сэм кәши шәңкап тывәс

Тәм непек тадаң па кәшаң хәннехуятат пәта мосмитл. Тәта хәншман, муй щирн сәм кәши олаңан уша верты рәхл, па муйсәр нәтупсы мет олаңан верты тохтурат кәшаң хуят хуши йити мәр. Тәм хәншум ут унтасн нын веритләты шәңкап сәм кәшийн юхтум хәннехәя нәтты.

Россия мұевн 80 % арат мир сәм мәш эвәлт антәма йиләт. Щит юдн, рәпатайн, рұтьщаты пурайн, оса тәхетн тывл. Ар пеләк щимәщ вер шәңкап питыйл. Щи пәта мосты артән щимәщ хуята нәтты ки, лүв лыдәңа хәщл. Хүв мәр тохтур ки ән вохлы, щи пурайн кәшаң хәннехәя нәтты лавәрт.

Шәңкап сәм-кәши

Муй щирн уша верты рәхл, хути хәннехә шәңкап сәм кәшийн юхәтса:

- ◆ шәңкапн сәм нәрәтты, сәм шумәртты питды ки, сәм нюр хошийл оңты лүвәт лыпийн (оңты лүв лыпийн хун нүм пеләкн), веткем минута мәр;
- ◆ кәши тывл пүва пеләк ләңкәрн (еш сорн), пүва пеләк поңхәлдн, ешн, пүва пеләк сапәлдн па ил пеләк аңәнән, шәлдта ләңкәрәнән, ешңәнән, хун нүм пеләкн;

◆ сәм кәши пурайн далты лавәрт, хәннехә щомлы йил, мулды эвәлт пәл, охәтты вүратл, охәтл, давленияйд ая йил;

◆ сәм кәши тывл, хән хәннехә мулды лавәрт ут верл (вот ешалт сора шәшл, хоңтеп хүват нух хәңхәл, ар дөл) муй па дыкащл, дывәтл, үвл, пакәнд па па ут пурайн.

Шәңкап сәм кәши юхәтты



ВЭЯТН ШИ ОЛАҢАН

◆ *Ән рәхл ацетилсалициловой кислота (аспирин) яньщты, нынана щи пуртән ән рәхл ки, муй па тепл, па сәл кәши-мәш тәйтты пурайн;*

◆ *ән рәхл нитроглицерин пуртән деты, хән шәңкап вевды-щомлы йилты, шәңкумдыйтты, хән ух кәша йил, ух шувемәды, семңән вевтама кәлды питләңән, лавәрт путәртты муй па шүт вүра хәтыйлды питләты.*

пурайн хәннехә нух килты, яңхты, шар талты, деты ән рәхл.

Муй мет сыры верты мосл

Нын муй па хәннехә щимәщ шәңкап сәм кәшийн юхәтсыйты ки па вет минута мәнты юпийн ищиты ки кәши, имухты тохтур вохты мосл. Яң минута эвәлт хүвшәк лавәлды ән мосл.

Нын муй па хәннехә щимәщ шәңкап сәм кәшийн юхәтсыйты ки, па нын хушана тохтур вохты щир антәм, хуят кепи вохаты, дәдн нын пәдльница ат тәсыйты.

Лүв сәттәда машинайн мәнты ән мосл, тәп щи пурайн, хән немхуят ванән ки антәм.

Сәм кәши юхәтты юпийн мосл щиты верты, мәта щирн нын тохтурн путәртсыйты муй па тәмиты:

◆ «скорая помощь» леккарәт вохты;

◆ омәсты муй па ух нухшәк пунман улты, 0,25 г аспирин пуртән ләхәлды па юхи деты па 0,5 г нитроглицерин пуртән/капсула (ара пуремәты) нядум илпия пунты, юхи ән деты (нядум илпийн тәйтты);

◆ сапл, лак лыпаща верты па ишни пелки пунты, дәдн вот рүв ат вәс;

◆ аспирин па нитроглицерин пуртәнңән левум юпийн 5-7 минута мәнәс, тәп ищиты кәши вәд ки, кимит пүш па нитроглицерин пуртән үңда пунты мосл;

◆ 10 минута щи юпийн ищиты кәши-мәш ки вәл, хәдмит пүш нитроглицерин үңда пунты;

◆ нитроглицерин олаң пүш муй па кимит пүш деты юпийн: вевдослы йисты, шәңкумсыйты, лавәрт далты питәс, мосл улты, күрлән нух алумты, и астан йиңк яньщты, нитроглицерин үңда па ән вүты.

«Центр медицинской профилактики» тәхи айкел хәнты ясаңа тулмащтәс:
Надежда Вах



Макеевка вош нявремәт, щит Донецкой Народной Республика эвәлт юхтум мойң ёх, вәщ тыләщн 26-мит хәтлән «Торум Маа» музей хуща вәсәт. Нявремәт мўң Югра округега рўтыщәты па мәшлал ймәлтәты юхәтсәт. Мўң Югра округев па Макеевка вош күтлалн нәтәсты непек хәншман тәйләт. Щи поступсы непекн ёш пос пунман тәйләңән Югра губернатор Наталья Комарова па Макеевка вош кәща хә Владислав Ключаров.

Макеевка вош нявремәт «Торум Маа» хуща

Ёмвошевн тәм юхтум нявремәт и хотәң ёх нявремәт вәлупсы ләщәтты Центр хуща вәлләт. Югра мўва тәмхәтл 150 рўтыщәты няврем юхәтсәт, 49 хуят мўң Ёмвошевн, па ёх Сәрханл вошн вәлләт.

Юхтум нявремәт лавәрт сурта хәщум пушхәт, тәх ёх әңкилы-ащилы хәщсәт, лапәтты-яньщтәты хуят ән тәйләт, тәх нявремәт па ащилал дәл пәнта питсәт па сыр-сыр лавәрт верәта хойсәт. Щи пәта арал пеләк нявремәт нумәслал шәкәнман вәлләт.

Тәм лўң мәр нявремәт мўң мўвев хуща экскурсията йңхләт па щи мултаса сыр-сыр мәш ймәлтәты верәт тәйләт, нумсәт ләщәтты тохтурәтн дыв нумәслал йм тәхи пәла керәтлайт. Нявремәт арсыр сәма мәстәты верәт верләт па мўң мўвев нявремәт пилә вәйтантийләт.

«Торум Маа» музей хўват нявремәта экскурсия Дарья Кунина верәс. Лўв мойңа юхтум нявремәта Югра увәс мир йис вәлупсы олаңән, увәс мир йис верәтолаңән путәртәс йис. Сыр-сыр хўл вәлты пурмәсәт, йиңкән йңхты хопәт, щит хәнты хопәт па юрн хопәт ванлтәсийт. Нявремәта вера әмәщ вәс вой вәлпәс пәнт хўват шәшиләты, щәта сыр-



▲ Макеевка вош нявремәт «Торум Маа» тәхийн

сыр вой вәлпәс пурмәсәт вантсәт: лўк сәсы, дошек сәсы, шовәр катәлты вәлпәсәт па па утәт. Щит иса йис ёх вәлпәсләты митрайт. Нявремәта вера әмәщ йис пурмәсәт вәнтты вәс, щимәщ верәт дыв вәлты мўвәлн хән вәлләт. Александр Шевченко ясаңән, лўвәла әмәщ вәс вой вәлпәсләты верәт олаңән уша верты, лўв пўпи павәтты вәлпәс олаңән иньщәсәс:

» Пўпи вәлпәс олаңән мәнәма вера әмәщ вәс вәнтты. Муй вўрн па щәха щи пўпи нух алумла, муй елды верты питләт щи вәлпәс ёх.

«Торум Маа» хуща юхтум мойң хуятәт уша версәл, муй эвәлт па муй вўрн йис увәс ёх ләнт верәнтыйлсәт, муй вўрн дыв ләтут щухал тўтн кавәртсәт.

Тәл хотн дыв дәмәтьл-

яты сухәт, анәт-сәнәт, няврем улты етн онтуп па хәтл онтуп па сыр-сыр йис вәлупсийн тәюм пурмәсәт вантсәт. Нявремәт вера йма хәләнтсәт, дывәл әмәщ вәс вантты йис увәс мир вәлупсы, щимәщ вер хуты дыв меләк мўвәлн әнтәм. Нявремәт экскурсовод ясаң хәләнтсәт па арсыр йис увәс ёх верәт олаңән иньщәсәсәт. Муй вўрн ищки мўвн тәм йисн нюки хотн вәлты пиш вәл?

Экскурсия етшум юпийн нявремәт «Каснә Маа» немуп тәхия мәнсәт. Щит келәт эвәлт верум кәсты пиш, арал пеләк нявремәт сора па йма щи келәт хўват мәнсәт, па щи вер дывәла вера әмәщ вәс. Ар няврем тәм верәтн мет олаң пўш кәссәт. Макеевка вош айлат хә Никита Кошубинский нумсәл ясаңа пунсәлә:

» Немәлт пурайн ма

тәмәщ келәт эвәлт верум тәхийн ән вәсум. Мет лавәрт мәнәма вәс холуп немәң тәхийн вәс и тәхи эвәлт па тәхия шәшумты па мулды щўңк пәнән тәты.

Н.Кошубинский айлдыева щи келәң ёш хўват кен тәхийн шәшмал мәр, лўв ләхсәл па мет лавәрт келән ёш хўват сора мәнәс па юхтәс. Варвара Верба тәм келәң ёшәт йма вәлләт:

» Мўң мўвевн ма иса пўш тәмәщ ёшәтн йңхты вер тәйсум, щи пәта щи ма сора мәнсум

Виктория Юдина, щит Макеевка нявремәт тәтьляты ими путәртәс:

» Мўң тәта вәлты хәтәл-лўв, щит кашәң хәтл әмәң хәтл щира вәл. Мўң музеепн йңхлўв, аквапарка тәтьлядыюв. Ешавәл вош луваттыйн вәнтты экскурсия тәлыюв. Мўң тәм вошн вәлты нявремлўв нәл пәкәта орсаюв, кашәң няврем пәклўв верәтн йңхәл.

Кәт лапәт мәр Югра мўвевн тәм нявремәт вәлты питләт. Вәйт лор тыләщн кимәт няврем пәк Донецкой Народной Республики эвәлт юхәтл па 150 няврем мўң мўвевн мойләты питләт.

Путәр хәншәс:
Пётр Молданов



Икит пан имит волты дэк



Ма номсэмэн аңкэм пан аңканкэм моньцитэвэл ма манам ими пан ики коряс варэм. Қантэх йоҳ кица дэвпадэк сивмосэл.

Икит ими вэты дэтэн сиввнам пан муким олхи йоҳ энты дэйлэт. Дэх кицахэл каркам әви мосэл. Қантэх тўдэх сөв йонты колвуй, суқ варты кол – чипырэн сиввнам дэйлэт.

Йисэн энты қончи имит әмат мусэт сарнам волта. Икит сивнам әнам энты пы дэйлэт топ қолвуймадэн кул пан войэх кәнча. Дэх сив йўкан моләпси әнтәп тойлэт –

кочэх пан пыкэт қорас сивват ыҳэтмин. Виципи икит пан имит кучәңэн опәт сивхи вол.

Па мәхивэл тувәм ими виципи энты мустэх икия вәта. Чән ики йота мәнәм ави ванчәл сумәнтахнат илшевиләтых. Йимәлды имит чән кайнидал тавәрлэт.

Татьяна Рынкова



Мужчина и женщина в культуре ханты

Вспоминая сказки бабушки и мамы в детстве, я выстроила свой образ мужчины и женщины. У народа ханты ценится не внешняя красота, а внутренняя.

При выборе невесты на возраст и красоту отец жениха внимания не обращает. Для него важней работоспособность

девушки. Умение шить одежды из звериных шкур, вышивать бисером стояло первоочередным, в последнюю очередь -

характер и внешность. В старину же остяков волновало больше здоровье женщины, так как от этого зависит материнство. Физической красоте мужчин уделялось внимания и того меньше. Он оценивался по роду занятий (охота, рыбалка). По одежде

мужчины можно судить о достатке.

Почти единственное украшение и знак достоинства у мужчин – это пояс, на котором находился нож, с многочисленными подвесками и металлическими цепочками. Одним из признаков красоты как у мужчин, так и у женщин считались длинные волосы. Они не только символ красоты, но и душевная сила человека. Женщина-чужеродка всегда представляла угрозу для мужчин. Так, вышедшая замуж женщина, покрывала лицо платком.

Платок на женщине, покрывающий голову и лицо, служил преградой для проникновения в душу.

Татьяна Рынкова





Тапытот сопас каркама тэсятты

Комсомольцыт па айтат ёх ударной тылысьны, мата от 15-мит июль эвыт мантл, комсомольцыт па айтат ёх тапытот тэсятман яма рупитты. Ай ёх па эвет юрны отынгимит августа сёрыс советьянг хутым тоннилос па катсот ветьянг тонн арат курась тэсятман.

Октябрьской районны пум верты па силос понты харетны нитысот айтат колхозник, рабочий па служащий

рупитл. Тыв ветсот тонн пум, нитысот нитыянг хутым тоннилос па хутымьянг вет тонна арат курась тэсятты.

Сургутской районны тапытот сопас тэсятты харетны катсот тапытыянг комсомолец рупитл. Тата иса ирьянг комсомольской айтат ёх бригада верман. «Путь к коммунизму» колхозны (Ём вош район) комсомольцыт тывы мирхотэтны тапытот сопас

«Ханты ясан» газета лўңатты ёх!

Тәмхәтл мўң «Ханты ясан» газетаев 65 ол постаты вўраңан ветхущьяңмит иньщәсупсы хәншлўв. Юхлы ясан тыв китаты: khanty-yasang-65@mail.ru.

15. Хән редакцияйн Таисья Степановна Себурова рәпитты питәс?

тэсятты пата хутым звена верта решитсыт. Звенаитны руководитта Сергей Добрынин, Владимир Холодилов па Анатолий Вохмин партсайт. Звенаит нютьесь касман рупитты. Тыв июль ветхосьянг хатл мары хутымсот ве-

тянг тоннилос тэсятты. Мет яма рупиттыт Молоковайнгын, ивьэвыссангнгын, Юра Захаров, Саша Салтанов, больницаны рупиттыты Зина Сургутскова и па айтат ёх.

П. Никитин

Колхозны верыт нох тэсятта мосл

Амтынга па утл вантат, хун картопка харетны картопка яма энмыт. Тыв яма энмыттыт сиртны, хун омсым отыт самынга, куся сирны тапыр эвыт тыстамман, нох окучиваитман энмыттытаит.

Си сирны, иса юртат понман рупиттыт Карл Маркс нэмып колхоз (Октябрьской район) Андринской участок полеводыт, хотя бригадира тов. Берестов утл. Там бригада членыт Белых Мария, Берестова Аграфина, Полякова Тая па колхозны антутты нэ школа техничка тов. Локшина шенгк самынга картопка тапыр эвыт систамман па окучиваитман рупит-

сыт. Там участокны там рупутаит хувын етшисыт па интам картопка яма энмыт. Мосл ямастыта, что тыв поным юртат нартама ант мантыт, тыв ар картопка акыттыт.

Итампии мосл лопта, что там колхоз па участокнытны вер картопкаит тыстамтты отынгыт шенгк вевтама маныс. Нисюнг участок, хотя бригада Алачев Владимир утл, си куш Андра пунгытны па сята си куш колхоз правления, председател тов. Михайлов па партийной организация секретарь тов. Шаргин уттыт, картопка харет тапыр эвыт тыстамтты па окучиваитты яма вер организоваитман антутыс.

Иситы вевтама верыт

мансыт Пукшамыт па Кархотьюр участокнытны.

Па мет вевтама там верыт мансыт Сергинской ферманы, хотя бригадира колхоз животновод Батеньков Александр утл. Тата картопкаит иса лап энмысайт. Еша сив хотты тапырат маншысайт. Симись рупута эвыт ям урожай ант тавыттын.

Омсым отыт тапыр эвыт нох тыстамтты па окучиваитта вер шенгкува маным сайны колхоз и ёшвойхут тапытот тэсятта юхытшик питыс. Арт пораны пум сэвырта отынгийтты юкана там колхозны хотна 4 август унта ар хоят картопка харетны тапыр тыстамман па окучиваитман

рупитсыт. Симись вевтам верыт пата интам и пум сэвырты верыт шенгк атма мантыт.

Мосл ямастыта, что колхоз правления (председатель тов. Михайлов па парторганизация секретарь тов. Шаргин) колхоз рупутаит тэсятта яма вуянтынгын. Интам мет вотанг - иса юрыт понта сита, тутн тарымты арат пум верта па животноводства продукция нох атымта. Ситыт нумман тайман колхоз правления еты верыт ий нох атымта мосл.

А. Александров
«Ленин пант хуват»,
11-мит август, 1959 от
№ 95 (226).

Ханты ясанг
(Хантыйское слово)
№15 (3603), 11.08.2022

Соучредители
Дума, Правительство
Ханты-Мансийского
автономного округа – Югры
Издатель
Департамент общественных,
внешних связей и молодёжной
политики Ханты-Мансийского
автономного округа – Югры

Редакция

Директор, главный редактор –
Динисламова С.С.
Телефон (3467) 33-36-82

Заместитель главного
редактора – **Рагимова Н.В.**
Телефон (3467) 33-24-02

Ответственный секретарь –
Вах Н.И.
Телефон (3467) 33-24-02

Адрес редакции и издателя:

628011, г. Ханты-Мансийск,
ул. Комсомольская, 31
тел./факс (3467) 33-17-52

E-mail: gazeta@khanty-yasang.ru
Газета размещена на сайте
www.khanty-yasang.ru

Отпечатано:

ООО «Новости Югры-
Производство» г. Сургут,
ул. Маяковского, 14.

Индексы 04393, 54393

Тираж 2166 экз.
Заказ 2776
Цена свободная

Газета
зарегистрирована
Управлением Федеральной
службы по надзору в
сфере связи,
информационных технологий
и массовых коммуникаций по

Тюменской области,
ХМАО-Югре и ЯНАО.

12+

Свидетельство о регистрации
ПИ №ТУ 72-00796
от 23 января 2013 г.

Мнение авторов публикаций
не обязательно отражает
точку зрения редакции.